



## 130 peserta hadir Seminar Bijak Mengurus Wang

Perpustakaan Universiti Malaysia Pahang (UMP) buat julung kalinya telah menganjurkan Seminar Bijak Mengurus Wang bertempat di Auditorium Perpustakaan Gambang pada 11 Julai 2012 yang lalu.

Seminar setengah hari itu disampaikan oleh Mohd Nasrul Shah Samsudin dari Jabatan Pendidikan Pelabur, Securities Industry Development Corporation (SIDC).

Program disertai kira-kira 130 peserta yang terdiri daripada staf UMP, Kolej Komuniti, Politeknik Sultan Haji Ahmad Shah (POLISAS), Kolej Islam Pahang Sultan Ahmad Shah (KIPSAS), Tentera Laut Diraja Malaysia (TLDM) dan beberapa badan berkanun dan sektor kerajaan di sekitar negeri Pahang.

Sepanjang seminar ini, para peserta didedahkan dengan topik-topik seperti mengenal pasti kepentingan mengurus wang, lima cara mengurus wang dengan bijak, mengenal pasti cara-cara melabur dengan bijak, kepentingan melabur dan menentukan sama ada sesuatu skim itu sah atau tidak.

Majoriti peserta berpuas hati dengan maklumat yang disampaikan, bahkan ada yang mencadangkan agar diadakan seminar sehari bagi membolehkan mereka mendalami ilmu pelaburan dan simpanan.

Menurut salah seorang peserta yang hadir, Rahin Hasan dari Jabatan

Pembangunan & Pengurusan Harta, seminar itu secara tidak langsung telah menyedarkannya mengenai pelaburan dalam unit amanah dan mengetahui cara mengurus wang dengan lebih bijak.

"Kini, saya tahu apa yang patut dibelanjakan terlebih dahulu dengan pendapatan yang diperoleh," katanya.

Manakala Rohaida Mohamad Idaris dari Perpustakaan pula berpendapat, selepas mengikuti seminar ini beliau lebih mengetahui cara untuk mengurus wang dengan baik, tahu tentang bagaimana menjana duit dengan melabur.

"Di samping itu, saya turut didedahkan dengan cara terbaik untuk mengurus hutang bagi mengelakkan nama disenarai hitam," katanya.

Wan Nor Hamdy Wan Mohd Nowalid, dari Pusat Pembangunan Korporat & Pengurusan Kualiti pula memberitahu, melalui seminar ini beliau mengetahui mengenai pelaburan unit amanah dan keduanya kita kena selesaikan hutang-hutang yang penting terlebih dahulu apabila mendapat gaji.

Selain ceramah, turut diadakan pameran dari MAA Takaful Haj dan BSN Prudential. Peluang mengadakan pameran ini membolehkan peserta bertanya lebih lanjut mengenai produk-produk yang ditawarkan.

